



Na osnovu člana 22 Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta Bosne i Hercegovine na I. nastavku 58. redovne sjednice održanom 29. januara 2020. godine, usvaja

ZAKON
O IZMJENAMA I DOPUNAMA ZAKONA O JAVNIM PREDUZEĆIMA U BRČKO
DISTRIKTU BOSNE I HERCEGOVINE

Član 1

U Zakonu o javnim preduzećima u Brčko distriktu Bosne i Hercegovine – prečišćeni tekst (Službeni glasnik Brčko distrikta BiH, broj 22/18) u članu 11 stavu 4 riječi: “70% od iznosa jedne prosječne neto plate zaposlenih u tom javnom preduzeću.”, zamjenjuju se riječima:

“iznosa jedne prosječne neto plate isplaćene u Brčko distriktu BiH za prethodnu godinu.”

Član 2

Član 11a mijenja se i glasi:

“Član 11a

(Postupak izbora i imenovanja članova upravnog odbora)

- (1) Izbor kandidata za članove upravnog odbora javnog preduzeća vrši Komisija za izbor i imenovanje i mandatno-imunitetska komisija Skupštine Brčko distrikta BiH.
- (2) Komisija iz stava 1 ovog člana raspisuje konkurs za izbor i imenovanje članova upravnog odbora koji se objavljuje u tri dnevna lista, dostupna na cijeloj teritoriji Bosne i Hercegovine, te zvaničnoj internet stranici Skupštine Brčko distrikta BiH i bit će otvoren 15 (petnaest) dana od dana objavljivanja javnog konkursa.
- (3) Članovi upravnog odbora biraju se na osnovu uslova propisanih članom 12 ovog zakona i profesionalnih sposobnosti, te odražavaju sastav stanovništva Brčko distrikta BiH.
- (4) Komisija utvrđuje da li svi kandidati ispunjavaju uslove konkursa, intervjuiše i ocjenjuje kandidate, te utvrđuje rang-listu kandidata koju dostavlja Skupštini Brčko distrikta BiH.
- (5) Rok za provođenje postupka izbora članova upravnog odbora i dostavljanje rang-liste Skupštini Brčko distrikta BiH je 15 dana od dana zatvaranja javnog konkursa.
- (6) Skupština Brčko distrikta BiH imenuje upravni odbor s rang-liste kandidata koju utvrdi Komisija, u roku od 15 dana od dana dostavljanja iste.
- (7) Odluka o imenovanju članova upravnog odbora javnog preduzeća je konačna i protiv nje se može pokrenuti upravni spor.
- (8) Odluka o imenovanju članova upravnog odbora javnog preduzeća objavljuje se u Službenom glasniku Brčko distrikta Bosne i Hercegovine.
- (9) Postupak izbora članova upravnog odbora mora biti okončan prije isteka mandata dotadašnjim članovima upravnog odbora.”

Član 3

(1) U članu 12 stavu 1 iza tačke c) dodaju se nove tačke d) i e) koje glase:

“d) lica koja imaju manje kvalifikacije i manje radnog iskustva od poslovnog organa javnog preduzeća, kojeg biraju,
e) lica koja su u radnom odnosu u tom javnom preduzeću.”

(2) Dosadašnja tačka d) postaje tačka f).

Član 4

U članu 13 iza stava 2 dodaje se novi stav 3 koji glasi:

“(3) U slučaju prestanka članstva u upravnom odboru jednog od članova, mandat novoizabranog člana upravnog odbora traje do isteka mandata svih ostalih članova upravnog odbora.”

Član 5

(1) U članu 14 iza stava 1 dodaju se novi stavovi 2 i 3 koji glase:

“(2) Izmjene i dopune akata iz stava 1 ovog člana, donose se uz saglasnost osnivača.

(3) Svi pravilnici, njihove izmjene i dopune koji regulišu: plate, naknade, topli obrok, dnevnice i druga primanja, donose se uz saglasnost osnivača.”

(2) Dosadašnji stav 2 postaje stav 4.

Član 6

Član 17 mijenja se i glasi:

“Član 17

(Razrješenje upravnog odbora)

Osnivač razrješava članove upravnog odbora, prije isteka perioda na koji su imenovani i to:

- a) na zahtjev člana,
- b) ukoliko član više ne ispunjava uslove za članstvo,
- c) ukoliko član ne izvršava svoje obaveze i dužnosti u skladu sa zakonom, aktom o osnivanju i statutom javnog preduzeća, te drugim važećim propisima,
- d) ukoliko godišnji poslovni plan javnog preduzeća nije upućen u proceduru u skladu sa zakonom,
- e) ukoliko osnivač ne usvoji izvještaj o radu i finansijskom poslovanju javnog preduzeća,
- f) ukoliko osnivač nije dao saglasnost na godišnji poslovni plan.”

Član 7

Član 24 mijenja se i glasi:

“Član 24

(Razrješenje direktora)

Upravni odbor razrješava direktora s dužnosti, prije isteka perioda na koji je imenovan i to:

- a) na zahtjev direktora,
- b) ukoliko direktor više ne ispunjava uslove za imenovanje,
- c) ukoliko osnivač ne usvoji izvještaj o radu i finansijskom poslovanju javnog preduzeća,
- d) ukoliko su ispunjeni drugi uslovi propisani zakonom, aktom o osnivanju, statutom i drugim važećim aktima javnog preduzeća,
- e) ukoliko direktor ne izvršava obaveze i dužnosti koje su propisane zakonom, aktom o osnivanju ili drugim aktima javnog preduzeća.”

Član 8

(1) U članu 29 iza stava 2 dodaje se novi stav 3 koji glasi:

“(3) Godišnji poslovni plan za narednu kalendarsku godinu, mora biti upućen osnivaču, radi dobijanja saglasnosti, do kraja tekuće kalendarske godine.

(2) Dosadašnji stav 3 postaje stav 4, a dosadašnji stav 4 se briše.

Član 9

Član 38 mijenja se i glasi:

„Član 38 (Izveštaj o radu i finansijskom poslovanju)

Javno preduzeće podnosi Skupštini Brčko distrikta BiH i Vladi Brčko distrikta BiH izvještaj o radu i finansijskom poslovanju javnog preduzeća, najmanje dva puta godišnje.“

Član 10

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-786/20
Brčko, 29. 1. 2020. godine

**PREDSJEDNIK
SKUPŠTINE BRČKO DISTRIKTA BiH
Esed Kadrić**